

**Пяток четвертыя седмицы.
На шестом часе.**

Тропарь пророчества, глас 6:

**Кресту Твоему поклоняемся, Владыко, и святое воскресение Твое славим.
Слава, и ныне: тойже.**

Прокимен, глас 6:

Тойже есть Щедр, / и очистит грехи их. Стих: Внемлите людие Мой закону Моему.

Пс 77:38А, 1А

Пророчества Исаиина чтение.

Тако глаголет Господь: приближаются Мне людие сии усты своими, и устнами своими почитают Мя, сердце же их далече отстоит от Мене. Все же почитают Мя, учаще заповедем человеческим и учениям. Сего ради се Аз приложу, еже преселити люди сия, и преставлю я, и погублю премудрость премудрых и разум разумных сокрою. Горе творящим глубоко совет, а не Господем, горе в тайне совет творящим, и будут во тьме дела их, и рекут: кто ны виде? И кто ны уразумеет, яже мы творим? Не якоже ли брение скудельника вменится? Еда речет здание создавшему е: не ты мя создал еси? Или творение сотворшему: не разумно мя сотворил еси? Не еще ли мало, и приложится Ливан, аки гора Хермель, и Хермель в дубраву вменится? И услышат в день оный глушии словеса книги сея, и иже во тьме, и иже во мгле, очи слепых узрят. И возрадуются нищии ради Господа в веселии, и отчаявшиися человецы исполнятся веселия. Исчезе беззаконник и погине гордый, и потребишася вси беззаконующии в злобе, и творящии согрешати человеки в слове; всем же обличающим во вратех претыкание положат, понеже совратиша в неправдах праведнаго. Сего ради тако глаголет Господь на дом Иаковль, егоже определи от Авраама: не ныне постыдится Иаков, ниже ныне лице свое изменит Израиль. Но егда увидят чада их дела Моя, Мене ради освятят имя Моё, и освятят святаго Иаковля, и Бога Израилева убоятся.

Ис 29:13–23

Прокимен, глас 5:

Помози нам, Боже, / Спасителю наш. Стих: Боже, приидоша языцы в достояние Твое.

Пс 78:9А, 1А

**Пяток четвертыя седмицы.
На вечерни.**

Прокимен, глас 4:

Пасый Израиля, вонми, / наставляяй, яко овча Иосифа. Стих: Седяй на Херувимех, явися.

Пс 79:2

1. Бытія чтѣніе.

Речѣ Господь Авраму: изыди от земли твоея, и от рода твоего, и от дому отца твоего, и иди в землю юже ти покажу. И сотворю тебя в язык велий, и благословлю тебя, и возвеличу имя твое, и будеши благословен. И благословлю благословящия тебя, и кленущия тебя проклену, и благословятся о тебе вся племена земная. И иде Аврам, якоже глагола ему Господь, и идяше с ним Лот. Аврам же бе лет семидесяти пяти, егда изыде от земли Харран. И поят Аврам Сару жену свою, и Лота сына брата своего, и вся имения своя, елика стяжаша, и всякую душу, юже стяжаша в Харране, и изыдоша поити в землю Ханааню. И пройде Аврам землю в долготу ея, даже до места Сихем до дуба высокаго, хананеи же тогда живяху в земли той. И явися Господь Авраму и рече ему: семени твоему дам землю сию. И созда тамо Аврам жертвенник Господу явльшемуся ему.

Быт 12:1-7

Прокимен, глас 4:

Радуйтеся Богу, / помощнику нашему. Стих: Примите псалом и дадите тимпан.

Пс 80:2А, 3А

2. Притчей чтѣніе.

Незлбивый веру емлет всякому словеси, коварный же приходит в раскаяние. Премудр убоясь, уклонится от зла, безумный же на себе надеясь, смешавается со беззаконным. Остроростный без совета творит, муж же мудрый многая терпит. Разделяют безумнии злобу, коварнии же удержат чувство. Поползнутся злии пред благими, и нечестивии послужат пред дверьми праведных. Друзи возненавидят друзей убогих, друзи же богатых мнози. Безчестяй убогия, согрешает, милоуяй же нищия, блажен. Заблуждающие неправедницы делают злая, милость же и истину делают благии. Не ведят милости и веры делателие злых, милостыни же и веры у делателей благих. Во всяком пекущемся есть избытие, любосластный же и беспечальный в скудости будет. Венец премудрых богатство их, житие же безумных зло. Избавит от злых душу свидетель, разжизает же лживыя лестный. В страхе Господни упование крепости, чадом же своим оставит утверждение мира.

Притч 14:15-26